


Dende o ano 1996 a Deputación da Coruña conta cun centro oficial de información europea ao servizo da cidadanía e dos concellos da provincia, que presta especial interese a temas como o envellecemento da poboación, a agricultura, a pesca ou o desenvolvemento rural

Europe Direct A Coruña, a información máis próxima sobre a Unión Europea



Que é a Unión Europea?

A Unión Europea esténdese polo continente europeo, desde Laponia, ó norte, ata o mar Mediterráneo, no Sur, e desde a costa occidental de Irlanda ata as costas orientais de Chipre. Na actualidade, a Unión Europea está formada por vinte e oito países. O 29 de marzo de 2017, un deles, o Reino Unido, anunciou oficialmente a súa intención de abandonar a Unión. Non obstante, ata o 29 de marzo de 2019, continuará sendo membro con todos os dereitos e obrigas que iso implica.

A Comisión Europea, o goberno da Unión Europea, ten a súa sé en Bruxelas (Bélxica), como todo o mundo coñece. O emblemático Edificio Berlaymont é a sé central deste órgano, composto por 28 comisarios, procedentes de cada un dos estados membros. A Comisión ten encomendada a misión de defender o interese xeral da Unión no seu conxunto e está suxeita ao principio de independencia política, polo que ningún dos seus mem-

bros pode solicitar ou atender instrucións de ningún goberno, institución, órgano ou organismo.

No exercicio da súa misión, a Comisión ostenta o monopolio da iniciativa lexislativa, o que se traduce en que as directivas e regulamentos comunitarios parten dunha proposta inicial da Comisión. A Comisión propón normas sobre as que logo corresponde decidir ao Parlamento Europeo, elixido por sufraxio universal directo, e aos Gobernos electos representados no Consello da Unión Europea.

Estamos ante unha institución complexa e con competencias para propoñer medidas en multitude de ámbitos temáticos que nos afectan aos máis de 510 millóns de cidadáns e cidadás europeas.

Que é Europe Direct?

Co fin de achegar esta realidade complexa á cidadanía e crear conciencia europea, a Comisión conta coa rede Europe Direct.

A rede de información Europe Direct está presente en todo o territorio da Unión Europea con máis de 500 puntos de información, distribuídos nos 28 estados membros, que traballan cun obxectivo común: axudar a entender á cidadanía que é a UE e como lles beneficia, adaptando os seus servizos ao seu público local.

No Estado español existen 37 centros Europe Direct repartidos por todo o territorio, e en Galicia contamos con dous: na Coruña e en Lugo. A Deputación da Coruña é a institución que acolle o centro Europe Direct A Coruña (www.dacoruna.gal/europedirect). Dende o ano 1996 a institución provincial conta cun centro oficial de información europea ao servizo da cidadanía e dos concellos da provincia.

Entre outros cometidos, Europe Direct A Coruña responde preguntas sobre a Unión Europea: as súas institucións, a lexislación que se aproba, as políticas que executa, os programas

e as posibilidades de financiación da Unión Europea. Europe Direct A Coruña informa tamén sobre oportunidades de formación e mobilidade laboral en Europa. Ademais, promove o debate rexional e local sobre a Unión Europea, distribúe publicacións oficiais e ofrece ós usuarios a oportunidade de enviar as súas opinións, comentarios e suxerencias ás institucións da Unión.

Esta información de retorno é recibida pola Comisión Europea. A rede de centros Europe Direct recolle máis dun millón de consultas ao ano, que serven aos responsables políticos europeos para coñecer de maneira directa as necesidades e preocupacións da cidadanía.

Comunicando Europa, en clave local

Europe Direct A Coruña, dependente da Deputación da Coruña, presta especial interese aos temas que afectan á cidadanía e aos concellos da provincia, como o envellecemento da poboación, a agricultura, a pesca ou o desen-

vvolvimento rural.

A Unión Europea apoia os seus agricultores a gran escala: actualmente, un 40 por cento do orzamento comunitario, case 60.000 millóns de euros anuais, destínase á agricultura.

Estes pagos representan, por termo medio, aproximadamente o 30 por cento dos ingresos das explotacións e revísten, en particular, unha grande importancia para a supervivencia das pequenas e medianas explotacións agrícolas e para a explotación das rexións menos favorecidas.

Estamos inmersos no debate sobre unha vindeira reforma da política agrícola común no novo período de financiamento que comezará en 2020, e a Comisión iniciou unha ampla consulta pública sobre o asunto.

Despois da política agrícola, a segunda maior partida no orzamento da Unión Europea corresponde á política rexional. No período de financiamento 2014-2020 destinaranse ás rexións 351.000 millóns de euros, dos que o Estado español obterá aproximadamente 36.500 millóns. España foi, en termos absolutos, o maior beneficiario desta política. Entre 1989 e 2020 recibirá case 190.000 millóns de euros.

Ás veces preguntase por que as axudas deben pasar a través de "Bruxelas" en vez de ser repartidas directamente polos estados membros. Existen dous tipos principais de financiamento da Unión Europea: fondos xestionados central e directamente pola Comisión Europea, por exemplo para a investigación (Horizonte 2020) e fondos de xestión compartida entre a UE e os Estados membros, por exemplo os Fondos Estruturais e o Fondo de Cohesión. A UE confía a xestión destes últimos aos estados membros que son responsables da distribución ós destinatarios finais (empresas, agricultores, concellos, etc.).

Europe Direct A Coruña traballa actualmente nunha iniciativa para dar a coñecer á cidadanía como se invisten na provincia de A Coruña os fondos captados da Unión Europea. Este proxecto, que verá a luz a finais deste ano,



terá forma de mapa interactivo e permitirá coñecer as entidades e proxectos que lograron obter financiamento comunitario ao longo deste período 2014-2020.

O obxectivo final é que a cidadanía coñeza, de forma accesible e transparente, como está aproveitando a provincia os recursos que a Unión Europea distribúe.

MÁIS INFORMACIÓN

www.dacoruna.gal/europedirect

Twitter: @EDCoruna

Facebook: @EuropeDirectCoruna

Boletín 9º UE: publicación electrónica semanal de suscripción gratuita en europedirect@dacoruna.gal

